

PREGUNTA i KONTESTA TOKANTE E PROPOSISHON DI LEI



KALIDAT

Kua organisashonnan di akohida di mucha mester hasi uzo di un programa pa edukashon pre eskolar?

Solamente sentronan di mucha ku ta ofresé pasadia, ta obligá pa hasi uzo di un programa pa edukashon pre eskolar. Pa 'gastouderopvang', akohida despues di skol i akohida fleksibel e obligashon akí no ta konta pues. Ta asina si ku tur sorto di akohida di mucha mester stimulá desaroyo di muchanan riba tereno di idioma, 'rekenen' (traha sòm), 'motoriek' (manera di move) i abilitatnan sosial emoshonal. Kon un organisashon ta hasi esei, mester keda reflehá den e programa di aktivitatnan. Pensa por ehèmpel riba aktivitatnan manera lesa, hunga bou di guia i deporte. A akklará esaki den e proposishon di lei.

Kua programa pa edukashon pre eskolar e akohida mester usa?

Basá riba e programa BES(t) 4 kids ta fasilitá un trayekto di implementashon di Kaleidoscoop / High Scope, pero en prinsipio un organisashon ta liber pa skohe e programa ku e ta ofresé. A akklará esaki den e proposishon di lei.

Un programa di aktivitat variá ta apénas posibel na e akohida despues di skol pa motibu di e kantidat grandi di hùiswèrk.

Den e proposishon di lei a inkluí e eksigensia ku organisashonnan di akohida di mucha mester ofresé un programa di aktivitat variá. Esei ta nifiká ku akohida despues di skol no mag konsistí di solamente guia di hùiswèrk, pero ku mester ofresé suficiente otro aktivitat. Na e momentu akí ta parse skol ta duna muchanan masha hopi hùiswèrk, di manera ku pa motibu di falta di tempu kasi no ta posibel pa organisá otro aktivitatnan tambe. Esei ta rekerí konsulta i koordinashon ku e skolnan básiko pa garantisá ku por kumpli ku e eksigensia akí. P'esei Entidat Públiko, basá riba e programa BES(t) 4 kids, lo pone e tópiko aki na diskushon den e ret pedagógiko insular.

Kiko ta reglá pa muchanan ku un nesesidat di kuido?

Un di e puntonan di salida di e proposishon di lei ta ku muchanan por hasi uzo di akohida di mucha, tambe muchanan ku tin mester di sosten òf kuido adishonal. Pa e motibu ei ta duna e organisashonnan di akohida di mucha e posibilidat pa duna akohida i guia na muchanan ku mester di kuido mas tantu posibel den nan propio organisashon. Nos ta yama esaki akohida inklusivo. Den proyektonan piloto ta investigá separá riba kada isla di ki manera akohida di mucha inklusivo por haña forma, kon organisashonnan di akohida di mucha por hasi un apelashon riba ekspertisio i prebishonnan profeshonal ku ta nesesario ora di duna sosten na muchanan ku mester di kuido i kua gastunan tin embolí ku esaki. A base di e resultadonan di e proyektonan piloto i konkretisashon di e struktura di kuido, e Entidatnan Públiko i Gobièrnu Sentral lo stipulá palabrashonnan (finansiero) den un areglo spesífiko. Pues no ta detayá esaki ainda den e proposishon di lei.

FINANSIAMENTU

Dikon mayornan mester paga e kontribushon di mayor na Gobièrnu Sentral na lugá di na e organisashon di akohida di mucha?

Ora e lei drenta na vigor, mayornan, manera e ta awor aki, por traha palabrashonnan ku e organisashonnan di akohida di mucha tokante e akohida di nan yu. Lo anotá e palabrashonnan. Kiko si lo bai kambia, ta ku e mayornan lo bai paga e kontribushon na e unidat SZW di RCN, en bes di na e organisashon di akohida. E unidat SZW lo bai paga e gastunan di akohida, (ku ta hopi mas haltu ku e kontribushon di mayor) den un biaha na e organisashonnan di akohida di mucha. Esaki tin diferente benefisio:

- Mayornan por paga a base di nan rekursu finansiero, pa asina e akohida ta aksesibel pa tur mayor. Mayornan ku un entrada hopi abou lo bini den remarke pa un tarifa rebahá. Pa haña esaki nan por entrega un petishon na e unidat SZW di RCN na e isla konserní.
- Pa hasi e pagamentu di e kontribushon di mayor mas fásil, mayornan por skohe pa laga retené e kontribushon di mayor for di e kompensashon pa yu ku nan ta risibí na un base mensual di unidat SZW. Esaki ta kita e karga atministrativo mensual pa e mayor.
- Organisashonnan di akohida lo haña seguridat tokante e pagonan di e kontribushon di akohida di mucha, independiente di loke mayornan (por) a paga. Akohidanan i mayornan di kriansa den niun forma mester preocupá mas si mayornan lo bai paga nan kuenta na tempu. E riesgo ta keda na e gobièrnu.
- Un benefisio mas pa laga mayornan paga na e unidat SZW di RCN, ta ku lo bai tin bista riba e kantidat, (kuantu mucha i parti di dia) for di organisashon di akohida di mucha.

E kompensashon pa akohida di mucha ta suficiente, e ta kubri tur gastu adishonal tambe?

E punto di salida ora di stipulá altura di e kompensashon pa akohida di mucha ta, ku por paga tur gastu normal di akohida di mucha ku esaki. Pues e gastunan adishonal tambe ku surgi komo konsekuensia di e eksigensianan den e proposishon di lei. Ehèmpelnan ta gastunan pa por ehèmpel aktividatnan (deportivo), kuminda salú, mihó salario pa e profeshonalnan i akohida adishonal durante fakansinan di skol.

Ta permití pa generá entradanan komplementario?

No ta permití pa pidi mayornan un kontribushon di mayor adishonal, òf pa kobra pa sierto aktividatnan. Tampoko no mag kobra mayornan plaka di inskripshon. Ta asina si ku un organisashon di akohida di mucha tin mag di rekoudá fondo òf organisá un akshon di rekoudashon. Pero tampoko un akshon di rekoudashon no mag bai dje leu ei ku yunan di mayornan ku no partisipá, no por tuma parti na e akohida di mucha òf na e aktividatnan ku ta finansiá ku esaki. A akklará esaki den e proposishon di lei.

Si un mayor no paga e kontribushon di mayor, esei tin konsekuensia pa e kompensashon di akohida di mucha ku e akohida di mucha ta risibí di gobièrnu?

Si un mayor no paga e kontribushon di mayor, esei no tin konsekuensia e promé lunanan pa e kompensashon pa akohida di mucha. E kompensashon pa akohida di mucha pa e mucha en kuestion na e organisashon di akohida di mucha ta sigui kana normal. Gobièrnu Sentral ta karga e riesgo finansiero si mayornan no paga. Gobièrnu lo pone bo na altura na tempu ora un mayor no ta paga. Ta te ora e mayor no a paga diferente luna i e mayor nenga paga e pago atrasá, e ora ei numa Gobièrnu Sentral por disidí ku e famia no por hasi uzo mas di e akohida di mucha. Na e momentu ei e kompensashon pa akohida di mucha ku bo ta risibí pa e mucha akí ta stòp tambe. Ta informá bo al respekto na tempu.

Kon ta determiná altura di e kontribushon di mayor?

Den e proposishon di lei tin stipulá ku mayornan ta paga un kontribushon di mayor fiho. Gobièrnu Sentral ta determiná altura di e kontribushon di mayor, despues di konsultá ku e Entidat Públiko. E lo ta un kontribushon limitá, pasobra nos kier pa akohida di mucha ta pagabel pa tur mayor. Den komienso esei lo ta entre \$100 te \$150 pa luna pa uzo fultaim di pasadia, i entre \$50 i \$75 pa akohida despues di skol. Mayornan ku un entrada abou por haña un kompensashon parsial di Gobièrnu Sentral. Pa nan e kontribushon pa luna lo ta mas òf ménos \$40 pa pasadia i \$25 pa akohida despues di skol. E kontribushon adaptá akí ta kuadra mas òf ménos ku e gastunan ku un mayor mes lo a hasi pa kuminda, bruki i aktividatnan. Básikamente e akohida di mucha ta kasi pòrnada. Si un mayor no por paga e kontribushon di mayor redusí tampoko, e mayor por entregá un petishon serka e Entidat Públiko pa kompensá e pago di e kontribushon di mayor.

Kiko ta pasa aweró si mi tin pregunta òf keho tokante e finansiamentu?

Unidat SZW di RCN lo ehekutá e areglo. Organisashonnan di akohida di mucha i mayornan por akudí na unidat SZW di RCN riba nan propio isla pa hasi pregunta tokante finansiamentu, entregá informashon rekerí i pa duna keho.